

Formado Sr. Mike Eman

Cu renobacion di John F. Kennedy School lo tin contribucion economico y comunitario na Aruba

ORANJESTAD - Proyecto bo Aruba ta un otro proyecto cu gobierno lo bay duna atencion pa loke ta Aruba mes. Formado Mike Eman a splica cu e sa cu den un comunidad tin inversionnan importante cu ta bin for di e sector publico, semi publico y e sector priva. A haci un inventarisacion di e inversionnan cu ta bin for di e sector publico y semi publico cu sinembargo ta importante pa locual ta trata e proyeccionnan economico pa e aña 2014, 2015, 2016 y 2017 y tambe pa creacionnan di empleo pa e añanan cu ta bin. Logicamente e proyectonan aki tin dos efecto. Nan tin e efecto di e proyecto riba su mes, kico e ta encera y e tin e efecto di e inversion y di e creacion di empleo. Di e grupo cu ta e ekipo di Bo Aruba, ta e team di infraestructura cu ta traha riba tur e proyectonan publico y semi publico, Eman a comenta.

INVERSIONNAN CUANTIOSO

A haya presentacion di e proyecto di hospital cu ta bay ta un inversion cuantioso tambe y cu ta bay tuma cuater aña di construccion. Sigur esaki lo tin un impacto grandi riba economia di Aruba. Nan a duna un presentacion tambe

mescos cu a haya for di e cinco MFAnan cu ta e acomodacionnan multi funcional cu lo bin na Noord, Paradera, Santa Cruz, Savaneta y San Nicolas. Nan a duna presentacion tambe di e proyecto di renobacion di John F. Kennedy School, el a bisa.

2 MIYON DEN JOHN F. KENNEDYSCHOOL

Eman a menciona tambe cu e proyecto aki ta un proyecto cu ta bay encera tanto renobacion, restauracion di e edificio historico aki y un construccion di un edificio adicional pa asina por acomoda tur e departamentonan relaciona cu educacion na Aruba. Esey kiermen cu un cantidad di 2 miyon florin di huur di edificio cu na e momentonan aki gobierno ta huur pa acomoda diferente departamento di enseñanza, tur lo por bay wordo ubica den edificio nobo restaura di John F. Kennedy School. E proyeccion ta cu e edificio aki ta inicia na februari 2014. E proyecto aki tin cu cuminsa, Eman a enfatisa. Ainda falta e parti di aprobacion di parlamento cu na e momentonan aki ta den parlamento y cu den e simannan aki ta spera e aprobacion di e proyecto aki.

UN CONTRIBUCION



ECONOMICO Y COMUNITARIO

Cu e proyecto di John F. Kennedy School tin e proyecto di John F. Kennedy Community Auditorio cu tambe ta bay ta un proyecto cu tin un contribucion economico y comunitario pasobra na Aruba na e momentonan aki, tin pa loke ta trata eventonan di lectura of eventonan di cierto presentacionnan di Arte of di Cultura, e escogencia ta sea un sala di 450 of 500 persona na Cas di Cultura of na un aula di Universidad di mas of menos 100 pa 150 persona of tin cu bay un convencion center cu ya caba ta riba 1000 persona. Eman a sigui splica cu no tin salanan comunitario cu por ubica pa un lectura importante

of un presentacion di arte of cultura na un tamaño di mas of menos 200 of 250 persona, cu toch hopi biaha ta net e tamaño cu ta mira cu ta necesario pa lecturanan. Ora bay na aula di Universidad riba momento cu tin un lectura cu ta capta hopi atencion den nos comunidad por mira cu personanan ta te pafu di e aula di universidad of nan ta wordo reparti den dos sala. Recientemente tabata tin mas di e ocasionnan aki cu por a mira cu net e tamaño di un sala representativo caminda cu tabata por a promove discusionnan intelectual, discusionnan científico. Por a mira cu no tin un sala adecua pa esey.

RENOBACION DI UN RECONOCIMIENTO

E Auditorio sigur lo ta esey, banda di ta un contribucion importante pa completa henter e hala aki cu ta bay tin na rotonde, caminda cu tin un ministerio completamente di educacion y banda di dje lo bay tin un auditorio cu e mesun nomber cu sigur tambe ta un reconocimiento importante di un presidente cu porciento riba 22 di november di e aña aki ta recorda cu 50 aña pasa el a wordo asesina y na Merca e momento aki e personahe un biaha mas ta den reflexion nacional y reconocimiento pa su contribucionnan na mundo ta bin padilanti un biaha mas y lo ta corecto tambe cu Aruba tabata tin un scol dedica na su nomber y e scol a deteriora pa restaura tambe e aspecto diplomatico aki ta cu nos relacionnan cu Merca y locual ta corecto pa haci tambe den un sentido di ora duna reconocimiento na un persona e homenahe mester keda existi y no por desaparece den un edificio cu a deteriora.

Ta sigur cu e restauracion di John F. Kennedy School, construccion di e auditorio lo ta un contribucion hopi positivo na reestablece e conexion ey tambe di reconocimiento cu Aruba a haci hopi aña pasa, Eman a bisa. □